

Tuesday, April 14, 2026

Time - 2:30pm - 2:35pm

REGIONAL NEWS BULLETIN

(MIDDAY)



EX-CM

MNF President leh Chief Minister hlui Pu Zoramthanga'n a chanchin ziahna 'From Guerrilla Fighter to Chief Minister' chu vawiin khan Larsap General (Rtd) Vijay Kumar Singh a'n a tlangzarh.

Pu Zoramthanga lehkhabu ah hian Mizoram tana zalenna an sual dan chanchin leh Chief Minister a nih chhoh dan kimchang taka ziah a ni a, saptawnga ziak niin a thinlung atanga a ziah a nih thu a sawi a, he chanchin ziak tur hian lehkhabu dang rawn a ngai lo a, kum 51 chhung dairy a lo ziah tawh ami nen a ziak a ni, Mizo National History ah a thuziak aia chiang leh thutak behchhan dang a awm a ring lo tih a sawi a ni.

Pu Zoramthanga lehkhabu chhut saktu Penguin Random House of India hi khawvel puma publisher lian ber niin MNF President chu hun harsa tam tak paltlanga damchhuak zinga mi chhuanawm anih avangin tihchhuah sak ngei an duh thu an sawi a, Lehkhabu hi Amazon ah lei theihin a awm a, Aizawl-a tlangzarh hnuah dawr hrang hrangah zawrhchhuah ani bawk ang.



MPCC PRESS CONF

MPCC thupuangtu leh general secretary Dr. Lallianchhunga chuan IAF-te tana Lengpui Airport bul ram lak a nih avanga ZPM sorkar thuneitu sang hriatpuina in cheng nuai 11,790 insemna awm anga lang chu Mizoram history-a mipui pawisa eirukna lian ber a ni a ti.

Vawiin khan Aizawl Press Club-ah thuthar thehdarhtute kawmin, Dr. Lallianchhunga chuan Indian Air Force te tana Lengpui Airport ram laknaah dan bawhchhiatna nasa tak a awm thu a sawi a; dan bawhchhe chung a Lengpui Airport bul ram IAF-te tana an lak theihna tura remtihna petute chu Chief Minister Pu Lalduhoma leh Revenue Minister Pu B. Lalchhanzova te an ni, a ti.

Dr Lallianchhunga chuan Val Upa Council (VUC) pawh ZPM sorkara hotu liante an inrawlh vang nge tun thlengin an la ngawi tih sawiin an benghriat ngeia cheng nuai tam tak eirukna thleng hi an ngawih bopui a nih chuan sorkar khalh ngil tura an awm ve reng hi a tul kher tawh lo, a ti a; IAF-te tana Lengpui Airport bul ram lak a nih avanga cheng nuai 11,790 insemna awm nia sawi hi Mizoram history-a mipui pawisa eirukna lian ber a nih thu sawiin, cheng tam tak dik lo taka insemna a awm ngei nia lang hi chhui chhuah a nih theih nan leh a mawhphurtute dan anga hrem an nih ngei theih nan Congress party chuan theihtawp a chhuah zel dawn tih a sawi bawk.



FIRE SERVICES WEEK

Fire Services Week chuan tukin khan Fire & Emergency Services Department Director Pu H.L. Thangzualan State puma hman turin a hawng a ni.

Kum tinin Fire Service Week hi ram pumah ni 14 leh 20 April chhungin hman thin a ni a, vawiin, April ni 14 bik hi Fire Service Day/Martyrs Day atan hman a ni thin bawk ni.

Pu H.L. Thangzuala chuan hawna thu sawiin a ram puma Fire Service Week hmanin a tum bulpui ber chu mipui vantlang leh mimal tin te, an nitin nun, khawsak leh chet velna tinrengah kangmei tichhuaklo tura invenna leh fimkhurna chang an hriat deuh deuhna tura inzirtir a nih thu a sawi a. Kumin Fire Service Week thupui sawizauvin Pu H.L. Thangzuala chuan, Kangmei lakah Sikul leh Damdawi inte a him zawk nan khawtlang mipuite kangmei tichhuak lo tura infuihna a nih thu a tarlang a. Fire Service Day 2026 pualin Department a thawk zawng zawngte chu mahni zawn theuhah inpekna thar nen, tha leh zual a hna thawk theuh tura sawmin, mipuite rawngbawltu an ni tih inhre thar theuh turin a chah nghal bawk a ni.

Mizoramah chuan kumin Fire Service Week pual hian damdawi in thlan bikahte Fire Safety Audit neih a ni dawn a. Hei bakah hian School hrang hrangah School naupangte Fire & Evacuation Drill leh Lecture & Demonstration neih pui an ni dawn bawk a ni.

